

MardeLira

A PRIMEIRA RESERVA MARIÑA DE GALIZA



Emilio Louro, secretario da Confraría de Lira (Carnota), foi convidado á Asemblea do 30 Aniversario de Adegas para presentar un dos proxectos ambientalistas e socioeconómicos máis ambiciosos do sector pesqueiro de Galiza na actualidade. A Reserva Mariña de Interese Pesqueiro de Lira conta cun trazo diferencial con respecto a outras reservas pesqueiras xa existentes en áreas protexidas do Mediterráneo e das Illas Canarias. Será a primeira de todo o Estado que nace da vontade dos habitantes e mariñeiros da propia localidade. O carácter medioambiental e social do proxecto fará posíbel, segundo Louro, a creación dun novo sistema na xestión dos recursos naturais pesqueiros que permita combinar o conservacionismo coa sustentabilidade económica do pobo: "O que mellor funciona son os planos de explotación xestionados polos propios pescadores", afirmou Louro.

A elección da zona de mar protexida no porto de Lira foi produto do coñecemento e sabedoría dos mariñeiros, alentada polo potencial pesqueiro e marisqueiro do lugar onde se concentran os principais bancos de pesca de baixura: nécora, centola, camarón, santiaguíño, lumbricante, polbo, ourizo, robaliza ou sargo.

Na Reserva Mariña haberá dous focos de reprodución nos que estará

prohibido pescar e no resto da plataforma protexida poderase faenar de acordo cuns requisitos especiais que aínda se están a estudar: topes de capturas, aumentos do tamaño mínimo da centola ou do polbo, réxime de vedas e paros... Ademais establecerase traballo de monitorización dos recursos, vixilancia e servizo de control por parte do sector e un seguimento do impacto social da Reserva Mariña.

"O que mellor funciona na protección dos recursos son os planos de explotación xestionados polos propios mariñeiros", afirma Emilio Louro, de MardeLira

Segundo Louro, o novo sistema de xestión dos recursos manexado polos pescadores de Lira, será unha oportunidade única para dignificar a profesión da pesca e do marisqueo en Galiza e para recuperar as especies perdidas na catástrofe do *Prestige*. O despoboamento continuado do lugar e o descenso de capturas nos últimos anos foron factores determinantes para a posta en marcha desta iniciativa. Isto xunto con outras problemáticas como a desestruturación do sector, a incerta rendibilidade do traballo, a sobreexplotación dos recursos pesqueiros e a redución das

Lira foi unha das localidades galegas máis danadas pola catástrofe do *Prestige* de hai 3 anos. Ten arredor de 1.000 habitantes e máis do 35% da súa poboación vive do marisqueo e da pesca. MardeLira presentou na Asemblea de ADEGA o proxecto sobre a primeira reserva mariña de Galiza, que tamén o é da fachada atlántica do Estado español. Cunha superficie de 1.700 Ha, foi promovida polos propios pescadores de Lira, dentro do proxecto de desenvolvemento da zona MardeLira.

axudas europeas a partires do ano 2007 deixan o pobo de Lira nunha preocupante situación socioeconómica.

Ademais dos membros da Confraría de Lira, participan no desenvolvemento do proxecto profesores da Universidade de A Coruña, asociacións ecoloxistas e a Administración autonómica co fin de que nuns anos a Unesco declare este lugar Reserva da Biosfera e que Galiza se converta en referente peninsular na materia.

MardeLira impulsa outras iniciativas dentro do mesmo proxecto de desenvolvemento socioeconómico da zona polo cal se constituíu unha empresa de venda directa de peixe en menos de 24 horas (Lonxanet S.L.) que está a dar traballo a un importante número de mulleres en Lira. MardeLira tamén participa na rede RECOPADES, formada por agrupacións pesqueiras de Arxentina, Uruguai e a Illa de Hierro na que se establecen os criterios sustentábeis de xestión na profesión do mar e desde a cal se pretende dar a coñecer a cultura mariñeira no conxunto da sociedade.

A primeira Reserva Mariña de Galiza aínda non é realidade, pero os mariñeiros de Lira prevén que comece a funcionar neste mesmo ano, tras a aprobación do decreto de xestión, e unha vez que se conta co compromiso público e formal do goberno galego de apoiar esta iniciativa.